

## **Ruslandimut Belarusimullu killilersuutaasunik suliniuteqarnissat naammassineqarnissaat pillugit Kalaallit Nunaannut inatsisissatut siunnersuut pillugu eqikkaaneq**

### ***Inatsisip siunertaa***

Russit sakkutuuisa sakkulersukkat Ukrainimi ulloq 24. februar 2022 nunamik tiguaajartornerat naalagaaffeqatigiinnermi pissutsinik immikkut illuinnartunik kinguneqarsimavoq. Saassussinernut taakkununga qisuariaatitut EU-p killilersuutaasunik suliniuteqarnerit amerlasuut (pillaatitut iliuusissat) atulersissimavai.

Kalaallit Nunaat EU-mut ilaasortaangilaq. EU-p peqqussutai, Ruslandimut Belarusimullu killilersuutaasunik suliniuteqarnissanik imaqartut, Ukrainimilu pissutsit malitsigisaannik eqqunneqarsimasut (pillaatitut iliuuseqarnissat pillugit peqqussutit) Kalaallit Nunaannut atuutinnginnerat tamatuma kinguneraa.

Suliassa qarfinni Kalaallit Nunaannit tiguneqarsimangitsuni, pillaatitut iliuusissat pillugit peqqussutit atulersinneqarnissaat pillugit inuussutissarsiornermut ministerip, inuussutissanut, nunalerinermut aalisarnermullu ministerip kiisalu assartuinnermut ministerip nalunaarusiornikkut malittarisassanik aalajangersaanissaannut piginnaatinneqarnissaat inatsimmi siunertarineqarpoq. Aammattaaq sakkut pillugit suliassa qarfinni EU-mit, FN-imit imaluunniit nunat tamat akornanni suliffeqarfinit aalajangerneqartunik, Ruslandimut Belarusimullu iliuusereriikkanut kinguneqartitsinerit naammassineqarnissaannut, inatsiseqarnermut ministeri piginnaatinneqarpoq. Iliuusereriikkanut kinguneqartitsinerit Ukrainimi pissutsit massakut pisut tunngavigalugit aalajangersarneqarsimasut iluanni, piginnaatitsineq killilerneqassaaq.

### ***Siunnersuutip imarisai:***

1. Pillaatitut iliuusissat pillugit peqqussutit Kalaallit Nunaannut atuutinneqarnissaat pillugit aalajangiinissamik periarfissat Suliassanut naalagaaffiup suliassa qarfianut tunngatillugu, pillaatitut iliuusissat pillugit peqqussutit Kalaallit Nunaannut atuutinneqarnissaat pillugit inuussutissarsiornermut ministeri, inuussutissanut, nunalerinermut aalisarnermullu ministeri aamma assartuinnermut ministeri nalunaarusiornikkut namminneq suliassa qarfimminni malittarisassanik

aalajangersaanissaminnut piginnaatinneqassapput. Tunngaviit tunngavigineqartut assigisai malillugit, peqqussutini aalajangersakkat atorneqarnissaat pillugit malittarisassanik aalajangersaasoqarnissaa, kiisalu peqqussutit Kalaallit Nunaannut atuuttut malillugit aalajangikkat imaluunniit inatsisitigut unioqqutinneqartussaannngitsunik aalajangiinerit atorneqarnissaannut imaluunniit naammassineqarnissaannut pisariaqartinneqartunik aalajangersakkanik aalajangersaanissaq, piginnaatitsinerup aamma periarfississagaa siunnersuutigineqarpoq.

Inatsisissatut siunnersuummi §§ 1-imiit 3 ilanngullugu innersuussutigineqarput.

## 2. Pillaatitut iliuuseqarnissat pillugit peqqussutit imarisaat:

Aningaasaqarnermut suliassaqarfimmi, assersuutigalugu aningaasaqarnermut instituttit ilaasa aningaasaatinik niuerfinnut isersinnaatitaanerannut killilersuinernik, aamma inunnut kiisalu inatsisitigut pisinnaatitaallutillu pisussaataasunut, immikkoortortaqaqarfinnut suliffeqarfiillu ilaannut, assersuutigalugu Ukrainip naalagaaffittut nunataata innarligassaannnginneranik, namminersortuuneranik aamma kiffaannngissuseqarneranik qajannarsisitsisunik suliniuteqartunut imaluunniit aarlerinarsisitsisunut iliuutsinut akisussaasutut kinaassusersineqartunut, Ukrainip naalagaaffittut aningaasaataanik eqqunngitsumik pissarsiarinnittunut, aamma inunnut Ukrainimi inuit pisinnaatitaaffiinik innarliinermut akisussaasunut, kiisalu inunnut imaluunniit inatsisitigut pisinnaatitaallutillu pisussaataasunut, immikkoortortaqaqarfinnut suliffeqarfiinullu taakkununga attuumassuteqartunut, killilersuinerit assigiinnngitsut, ilaatigut aningaasat aningaasaqarnermullu isumalluutit tiguneqarsinnaajunnaarsinneqarnerannik siunertaqartut, peqqussutini ilaatigut imaritinneqarput.

Tamakkua saniatigut Europa-Parlamentip Siunnersuisoqatigiillu Ruslandimut peqqussutaanni (EU) 2021/821-imi ilanngussaq I-imi allattukkanik tunisassianik dual-use-inik taaneqartartunik tamanik nunanut allanut tuniniaanermik inerteqquteqarneq pillugu peqqussutit imaqarput, taamaattoq tamatuma peqatigisaanik, avammut tuniniaanerup assersuutigalugu inunnik ikiuiniarneq siunertarippagu, inerteqquteqarnerup avaqqunneqarsinnaanera akuersissummillu tunisisinnaaneq periarfissinneqarpoq. Tamatuma saniatigut inuinnarmut inaarutaasumik atuisussamut tunisassiat inuinnarnik atugassat pineqartillugit, aamma avammut tuniniaanerup siunertaa erseqqissumik taaneqarsimatillugu, tunisassiat dual-use-inik taaneqartartut avammut tuniniarneqarsinnaanerat akuersissutigineqarsinnaavoq. Inaarutaasumik atuisussaq sakkutuujuppat imaluunniit silaannakkut angallannermut imaluunniit avataarsua pillugu nioqqutissiorfiuppat, akuersissummik tunniussisoqarsinnaanngilaq. Tunisassiat dual-use-nik taaneqartartut avammut tunisassiarineqarsinnaanerannik inerteqquteqarnerup saniatigut,

aamma tunisassianut dual-use-inik taaneqartartunut, peqqussutip ilanngussartaani I-imi taaneqartunut, teknikkikkut ikiuunneq, niueqatigiinnermi akunnermuliuttuunneq imaluunniit aningaasaqarnikkut ikiuunnermut inerteqquteqarneq aamma atuuppoq.

Tamatuma saniatigut nioqqutissiat ilaannik eqqussuineri avammullu tuniniaanermi killilersuineri peqqussutit imaqarput, matumani pineqarlutik nioqqutissiat inuulluarniutit erseqqissumik nalunaarsorneqarsimasut, tunisassiat silaannakkut angallannermut imaluunniit avataarsua pillugu nioqqutissiorfinnut tunngassutillit, teknikkikkut atortut kiisalu timmisartut orsussaannik avammut tuniniarneqarniaanermut inerteqquteqarnerit, aningaasaatit pillugit soqutigisat pissarsiarinissaannut imaluunniit pigeriikkat ilaneqarnissaannut inerteqquteqarneq kiisalu naatsorsuutiniq allattuineri- aamma kukkunersuineri suliaqarneri kifartuussinernik tunniussinissamut inerteqquteqarneq, matumani inatsisit malillugit kukkunersuineq, aamma akileraarutit pillugit siunnersuineq kiisalu suliffeqarfimmut- aamma aqutsisunut siunnersuinerit aamma avammut paasititsiniutit ilanngullugit. Taakku saniatigut russit umiarsuaannik nunamut tulaqqusinnginnernik aamma russit belarussillu aqqusinikkut angallassinermut suliffeqarfiutaannit pigisanik Unionip nunataata ilaani aqqusinikkut iserneq aqqusaarnerlu pillugit inerteqquteqarnermik peqqussutit imaqarput.

3. Sakkut pillugit suliaasaqarfimmi Ruslandimut Belarusimullu iliusereriikkanut kinguneqartitsinerit naammassineqarnissaannut periarfissamik pilersitsineq

Sukkasuumik sunniuteqarluartumillu naalagaaffiup Ruslandimut Belarusimullu nunanut allanut politikianik malititsinissamut inatsisitigut tunngavissanik pilersitsiniarluni, Danmarkimi iliusereriikkanut kinguneritit FN-imit, EU-mit imaluunniit nunat tamat akornanni suliffeqarfimmit aalajangersakkat tunngavigalugit atulersinneqartunut, sakkut pillugit suliaasaqarfimmi, FN-imit, EU-mit imaluunniit nunat tamat akornanni suliffeqarfimmit akuersissutigineqartut pillugit, aamma Ukrainimi pissutsit tunngavigalugit eqqunneqartut pillugit, Ruslandimut Belarusimullu iliusereriikkamut kinguneqartitsinerit naammassineqarnissaannut inatsiseqarnermut ministerip malittarisassanik aalajangersaasinnaanissaanut piginnaatitsinerimik pilersitsisoqartariaqartoq, Inatsiseqarnermut ministereqarfiup nalilerpaa.

Sakkut pillugit Kalaallit Nunaannut inatsimmi § 10 a-mi aalajangersakkamik nutaamik ikkussisoqarnissaa siunnersuutigineqarpoq, tamatumalu kingorna Ukrainimi pissutsit tunngavigalugit Ruslandimut Belarusimullu nunat tamat akornanni iliusereriikkanut kinguneqartitsinerit, Den Europæiske Unionimit (EU-mit), Naalagaaffimmit Peqatigiinnit (FN-imit) imaluunniit nunat tamat akornanni suliffeqarfimmit akuersissutigineqartut eqqunneqarnissaannut

naammassinninnissaq pillugu inatsiseqarnermut ministeri malittarisassanik aalajangersaasinnaalissalluni.

Ukrainimi pissutsit tunngavigalugit Ruslandimut Belarusimullu nunat tamat akornanni iliuusereriikkanut kinguneqartitsinerit, Den Europæiske Unionimit (EU-mit), Naalagaaffinnit Peqatigiinnit (FN-imit) imaluunniit nunat tamat akornanni suliffeqarfinnit akuersissutigineqartut, Kalaallit Nunaanni naammassineqarnissaat pillugit inatsiseqarnermut ministeri malittarisassanik aalajangersaasinnaalernissaa, aalajangersakkap kinguneraa. Naalagaaffiup ataatsimut isigalugu sakkut pillugit avammut tuniniaanermut politikkaa eqqarsaatigalugu, aamma aallaaviatigut tamanna pillugu Danmarkimi Kalaallit Nunaannilu assigiinnik malittarisassanik atuuttoqartariaqarnera eqqarsaatigalugu, aalajangersakkap atugassanngortinneqarnissaa, taamaaliornermi piumasqaataavoq.

Inatsisissatut siunnersuummi § 7 innersuussutigineqarpoq.

### ***Ingerlatsineq atortuulersitsinerlu***

Ukrainimi pissutsit immikkut ittut pissutigalugit, siunnersuut Folketingimi Inatsisartunilu ataatsikkut suliarineqassasoq isumaqatigiissutigineqarpoq. Taamaaliornikkut iliuusereriikkanut kinguneqartitsinerit sukkanerpaamik atortuulersinneqarnissaasa qulakkeerneqarnissaat siunertarineqarpoq. Aammattaaq nalunaarutit oqaaseqarfigineqarnissaat siunertaralugu nalunaarutit Kalaallit Nunaanni Namminersorlutik Oqartussanut saqqummiunneqarumaarput. Kalaallit Nunaanni pissutsit malillugit peqqussutit atorineqarnissaannut, imaluunniit peqqussutinut nutaanut kingusinnerusukkut eqqunneqarumaartussanut naleqqiullugu allannguutinut il.il. namminersorlutik oqartussat sunniuteqarniassammata taamaaliortoqassaaq.

Namminersorneq pillugu inatsimmi § 18 malillugu, Kalaallit Nunaanni Namminersorlutik Oqartussat oqaaseqaateqarsimatinnagit, nalunaarutit atortuulersinneqassanngillat.

Inatsisissatut siunnersuut Inatsisartuni Folketingimilu akuersissutigineqarnerata kingunitsiannguagut inatsit atuutilissaaq.